

**Benedeit, *Le voyage de saint Brandan* (arrivée au paradis)**

Avant en vait cil juvenceals,  
Par paraïs vait ovoec eals. 1730  
De beals bois e de rivere  
Veient terre mult plenerie.  
Gardins est la prairie  
Qui tuz dis est beal flurie. 1734  
Li flur süef mult i flairent,  
Cum la u li piu repairent,  
D'arbres, de flurs delicius,  
De fruit, d'udurs mult precius ; 1738  
De runceie ne de cardunt  
Ne de orthie n'i ad fusun ;  
D'arbre n'erbe n'i ad mie  
Ki süaté ne rechrie. 1742  
Flurs et arbres tuz dis chargent,  
Ne pur saisun unc ne targent,  
Estét süef tuz dis i est,  
Li fruiz des arbres e de flurs prest, 1746  
Bois repleniz de veneisun,  
E tut li flum de bon peisun.  
Li flum i sunt qui curent lait.  
Cele plentét par tut en vait : 1750  
La ruseie süet le mel  
Par le ruseit qui vient del cel.  
Si munt i at, cil est de or,  
Si grande pere, i a tensor. 1754  
Sanz fin i luißt li clers soleil,  
Ne venz n'orez n'i mot un peil,  
N'i vient nule nue de l'air  
Qui del soleil tolget le clair. 1758  
Chi ci estrat, mal n'i avrat,  
Ne de mals venz ja ne savrat,  
Ne chalz ne freiz ne dehaite  
Ne faim ne seit ne suffraite. 1762  
De tuz ses bons avrat plentét.  
Ço que plus est sa voluntét,  
Cel ne perdrat, süurs en est ;  
Tuz dis l'avrat e truvrat prest. 1766  
Bien veit Brandans cele goie.  
L'ure li semblet forment poie  
Qu'il estait a ço vedeir,  
Lunges voltdrat iloc sedeir. 1770  
Mult bien avant l'ad cil menét,  
De multes riens l'ad asenét :  
Bien diviset e si li dit

De quel avrat chascuns delit. 1774  
Vait cil avant e cißt après  
Sur un halt munt cume ciprés ;  
D'ici veient avisiuns  
Dum ne sevent divisiuns. 1778  
Angeles veient e sis oient  
Pur lur venir cum s'esgoient.  
Oient lur grant melodie,  
Mais nel poient suffrir mie : 1782  
Lur nature ne poet prendre  
Si grant glorie, ne entendre.